



明詩正聲卷十七

七言古詩八

廣陵

盧純學

江一夔

校閱

李先芳

掛劍臺行

口諾不如心諾深徐君之意季子心壯遊未畢  
徐君死寶劍匣中悲知己掛汝墳頭高樹枝寧  
論地下知未知

其二

昔人墳頭曾掛劍今人相知猶按劍我有龍泉  
未許人腰下虹光白於練千金不賣投知己交  
道那知論生死吁嗟古人良已矣

織婦詞

白露沾衣草虫唧唧老婦田間夜夜紡績達曙  
猶聞機杼聲衰年辛苦何時極初三初四月初  
見連宵坐待月如練木綿花少筋力衰七日促  
成一疋半兒啼饑女號寒里胥到門橫索錢機  
杼倚壁雙淚漣

哀江南

往年六月北防秋塞門胡騎聲啾啾今年三月  
颶風發海倭東南寇甌越江關夜下羽書急吳  
楚傷殘嗟何及會稽城頭白刃飛姑蘇臺下黃  
雲集連雲城郭化為燼婦女金帛那忍問六代  
繁華一水流西湖歌舞行人盡瀕海神州半陸  
沉江東子弟空豪俊已報東山起謝安更傳明  
月追韓信豐沛重開古戰場維揚水上魚麗陣  
旌旗直下建康路鍾簏山陵神可護九衢白日

瑣千門萬里長江注烟霧橫海樓船久寂寥扶  
桑銅柱漢時標獨憐漆室前年恨坐對桃花淚  
暗飄

廬山謠贈南康吳給事謫居

我聞匡廬盤據數千里左壓彭蠡右吞九江水  
恍如六鰲戴三山隨波上下起白頭浪裏飛來  
峰滄波倒瀉雙芙蓉南斗夜挂背簷樹老黿曉  
聽前山鍾講經臺畔香爐頂怪石巉巖晝常暝  
文殊岩下一憑闌吳楚群山競相騁我昔鞭鶴

遊此山誅茅結舍青雲間至今卓錫分南北天  
池月窟開禪關倏忽青天排盡障十二樓臺鬱  
相望瀑布常懸白玉虹恒沙突出黃金象中有  
幽人騎白鹿手搴玉笈靈樞讀自言陸海涉風  
濤誓伴烟霞老空谷五老擁篲遙相迎四仙避  
席爭留宿紫陽真人時候門南嶽夫人捧玉盆  
為君一洗人中垢同跨茅龍朝至尊

寄懷李于鱗學憲

去年君作關中客薊門西望秦雲白壺觴出祖

溝水頭牽衣信宿城南陌舊遊一夕各分飛君  
復東山謝病歸山濤老逐風塵吏獨抱嵇琴悵  
落暉

淮揚感述呈郝年伯丈

君不見洛陽少年好詞賦漢文前席真竒遇輕  
薄何曾負絳侯翻然遠謫長沙傅又不見青蓮  
居士踈狂客騎驢笑出長安陌柳色龍池眼自  
青秋霜明鏡頭空白憶昔金鑾奉朝制手捧金  
符從玉帝貂蟬一字殿中班珠履三千門下士

紫殿春頌官錦袍蘭臺夜宿青綾被添香侍女  
護朝衣題柱仙郎留姓字當時咲傲五陵豪斗  
酒新詩意氣高平明紫陌鳴金勒半醉青樓脫  
寶刀豈料風雲隨覆手白壁明珠憎多口明光  
宮裏奪朝簪掉臂掀髯下殿走出門一咲燕草  
碧冠盖如雲送遷客春明關外別仙寮雲泥咫尺  
成懸隔埋頭簿領復經年薄俸不值沽酒錢  
趨事恐遭官長罵扁舟又汎廣陵烟問道維揚  
淮海上觀裏瓊花開幾丈画橋吹落洞簫聲長

江瀉出蒲萄釀乘興不尋何水部吟翁高誼迥  
獨步好客長開金谷園輕財不入將軍庫老去  
風流古意存相逢肝膽照平原况是曲江舊門  
客傾山倒海復何言明朝更覓金山路揚帆海  
上窮真源并駕六鰲鞭海若手把三山當酒尊  
釣竿高掛扶桑樹閒看風波水上翻

方弘靜

秋月引

金井梧飛露氣清漢京三五月華生九衢塵洗  
淨如練玉兔霜毫遙可見珠簾初捲似蛾眉素  
影娟娟白玉墀流輝先映芙蓉闕甲第朱門光  
未歇侯家羅綺嬌欲寒玳筵波浸水晶盤金觴  
銀燭喧四座天河微微漸西墮忽聞萬戶搗衣  
聲風吹更向關山明沙場此去千重嶺誰憐塞  
外征人影

高應玘

京邸寫懷

我本烟霞人今作風塵客歎夢鄉山青永懷池

草碧青山碧草隔滄洲白雲渺渺思悠悠野鳥  
亂啼山鬼嘯西走肴函北燕趙日夕踟躕入都  
門小兒拍手向我笑倦倚青萍劍恥上黃金臺  
郭隗無奇氣樂毅非良材月明滿地瞬息去赤  
日行天不復迴燈前感慨對尊酒明發馬上重  
回首少年誓欲請長纓老大垂頭竟何有其如  
歸去閉玄關桃花流水天台山中石髓金光  
草服之令人永不老

張佳胤

三石篇

大漠以西三巨石錯列荆榛對孤驛文彩天開  
海嶽圖面面晶光盈十尺吁嗟此石生豈倉云  
誰置之古路傍停車顧眄日將晏僕夫語麻泣  
數行往年天子新明堂厥材萬國爭梯航燕山  
之石白勝玉何求此物勞要荒守臣當日功名  
亟檄書夜飛人屏息程途初不計山谿男婦徵  
傭無漢棘鞭石難尋渤海神鑿山誰是金牛力  
那許終朝尺寸移積屍道上紛如織中興令主

堯舜姿一葦聖德超茅茨皇上曾有一葦可居之論天門萬里竟不知幾使黔南無子遺君不見旅葵古訓老臣策蒟醬雖甘亦何益三石磴研風雨深千載行人增嘆惜

王世懋

長歌寄錢林寶

丹青昔數曹將軍自言魏武之子孫東吳錢卿亦如此昔為朱戶今青門婆娑行年六十餘小冠褒衣古丈夫半生一室似懸磬得錢只付黃

公壚客來且置床頭易客去從教釜底魚邇來向我誇生理四壁縱橫貯圖史竒書手寫十萬言綵筆神遊幾千里我朝畫品推沈周墨氣淋漓骨格道錢卿銳意追作者徃徃舉筆凌其儔憶昨致卿東海濱揮毫拂素如有神生平不識戴安道那知画理能益人青山滄波落卿手宇宙溟濛何不有幻境能令罔象愁晴霄坐叱神螭走不知文采置誰右却為丹青翻向後縱然赤牘能驚坐即有玄經還覆瓿嫁娶猶關兒女



心姓名空掛他人口眼中之交王子猷看竹偶  
作金陵遊馬曹躡躑非所好雪亦欲買山陰舟  
倩御貌我置丘壑去去相期桂樹秋

人日袁考功見過留酌小窓前酒酣放歌

却贈

今年人日百不娛客遊金陵家在吳金陵春事  
亦不薄有官何似當年無青溪館前日欲晡誰  
其過客袁大夫喜是舊日高陽徒十千斗酒不  
用沽床頭春甕足百壺春盤未倒綠窓暮春陰

滿地雪模糊渡口桃花未着葉門前楊柳難藏  
烏金陵少年紫驪駒有酒只過秦羅敷那知晚  
晚日易徂三十之年一再過二毛便欲侵頭顱  
男兒纔拄馬曹笏河山已隔黃公壚仰天且莫  
歌嗚嗚樽中酒盡可復呼霜落烏啼更明日摧  
眉還向府中趨

陳文燭

送李孝甫太僕還四明

木葉蕭蕭下城闕美人別我還吳越放舸晴牽

日暮雲停杯欲問青天月寒雲涼月解隨人一  
言投合偏相親河橋且繫紫騮馬朔風吹動白  
綸巾故山遙指東溟渤鴈蕩天台何萃岢問君  
職掌十二閑何人更愛千金骨渥洼竒種亦無  
媒負轅俛仰鳴長哀古來神識今安在秋深草  
沒黃金臺丈夫遇合皆如此眼底浮名竟誰是  
江行白也有新詩鴻鴈肯寄長安市

朱孟震

宛平李于美明府示余古墨齋集其事甚

竒乃秦蒲城亦有茲刻斷而復完之者  
則蜀中丞劉遠夫先生也二事一碑殆  
尤竒矣歌以紀之

吁嗟乎雲麾將軍毅且武一劍開元靜鼙鼓身  
後勲名十丈碑北海筆鋒雄萬古逸勢飛騰熊  
虎愁寒光歷亂蛟龍舞真跡流傳數百年何事  
幽州委榛莽斑斕那遣侵土花摧頽猶解支鬢  
宇護持神物春復秋徃徃精靈泣風雨青鞋布  
襪過者誰披尋邵孺真良苦仙李雲仍得宛平

耽書嗜古識其精萬牛輦致不遺力珠斗恍忽  
回光明樹之高齋顏古墨奔走好事聲喧轟由  
來至寶不終秘天意若待人工并青氊尔况還  
故物白壁誰復窺連城君不見劉柱史片石蒲  
城亦如此鐵葉銀鈎照大河徹天古色今猶紫  
顯晦升沉各有時異人先後兩爭竒好將物態  
觀人理聽我長歌古墨詩

水泉行

樓煩城頭曙光吐凌旦高原振笳鼓材官萬騎  
列鸛鷺甲士千羣擁羆虎弋鋌射天日月動旌  
旗捲地龍蛇舞猛志行疑踏賀蘭先聲似欲吞  
胡虜視師號令迅雷風大將行邊氣勢雄太子  
灘前雲結陣雁門關上月懸弓劒光秋水磨成  
碧袍色春花染作紅後隊蚩尤驚涿鹿前軍渭  
水儼飛熊晨經河曲觀營落午次水泉張燕樂  
天王威德被遐荒紛紛毳帳來沙漠胡婦雙鬟  
冠固姑紫貂緣飭珠垂絡繡襦織帶貌妖妍粉  
澤脂香容綽約亦有胡雛逞飛鞚鷹走狗欣

相控渾脫平翻河上波忽雷解作雲中弄名王  
辮髮錦衣裝猿臂垂身射竒中怒馬牽來是渴  
猊雕鞍鞞得盤么鳳轅門傳令劃初開九天晴  
日敞樓臺豪酋倏忽雲霧擁稽顙接踵來喧  
手捧銀盃傾乳酒跪獻 天使身摧顏脫冠露  
頂起為壽風引長袖高毳毼中有一胡狗力哥  
自言鄉里是溱沱一自丁年離代郡冰天草地  
歲時過酪漿羶肉厭飫久雄長部落饒牛駝身  
雖夷狄心中國誓死款貢期無他那顏傳語豐

犒饗紅錦輝煌出官帑肥羊千羖酒千瓮陳列  
庭墀縱歡賞拊膺嚙指喜融融 天王渥澤敷

窮壤醉胡鼓腹婦酡顏拜首顙天頭搶搶辭將  
天使出城隅揎拳捩袖爭驩呼須臾一胡發長  
嘯笑把鳴鏑彎雕弧草間趯趯起兔兔一簇頸  
血殷模糊馳來城下上天使以手加額聲嗚嗚  
吁嗟爾胡命曰上天之驕子昔也何驕今若此  
秦后空連萬里城漢家枉走和親使只言晉絳  
有鐘懸不道唐宗雪讐恥從金考鼓塞垣深朝

明言正聲 卷之十七  
絃暮管聲盈耳視師歸去報天子干羽兩階無  
乃爾小臣為作水泉篇億萬千年繼麟史

梁辰魚

吳宮曲

吳宮夜靜飛清商秦箏絃促春思長銀蟾三五  
流素光玉樓十二生微涼美人起舞雲錦裳翠  
袖盤拂雙鴛鴦君王酒酣樂未央蘭膏欲滅歸  
洞房歸洞房日初出越兵來入吳國朝作吳宮  
娃暮托五湖客人稱五湖之遊世所無恐其破  
越猶破吳不知妖艷傾人都當年猶恨身未誅  
君不見臨春閣兵初起擒虎入麗華死

黃克晦

登戲馬臺

戲馬臺高匹馬嘶雲深草滑翻馬蹄臺頭下馬  
問遺老彭城故址今東西黃河東流古城下亂  
山重重繞平野落日人家楚將營傷心農圃漢  
宮瓦當時叱咤孰為雄戲車戲馬樂軍中眼光  
射人火烈烈陣前白晝生雷風滎陽不信范增

計帳下空歌騅不逝美人縷縷血如猩壯士蕭  
蕭俱出涕天授天亡竟若何萋萋春草夕陽多

薊北門行贈陳中丞開府薊州

帝家薊州天北門滄溟碣石日吐吞萬山重重  
古鏤色雨雪凜冽風沙昏朶顏只尺隔城堡潮  
河川口入貢道番使盡通漢語言邊馬亦甘胡  
水草右連赤翟左烏桓幾曾烽火照長安遼陽  
以東備益急無冬無夏鞞鼓寒此時籌畫盡邊  
塞北鎮復當赤縣背朝堂萬里起拜公持印分

符出卧内秋風氣色自南來關門日白陰氛開  
未知旄頭墮何處已聞按劍登高臺我公平生  
何磊落片雲舒卷雷雨作六載從淹博望槎尺  
書不入平津閣當時節鉞大江邊坐令江水清  
且漣黃金吐光百煉火干將發花千橐煙薊北  
從今雄虎踞偏裨各有封侯志日逐單于不請  
和九姓羌氏仍斷臂古來將相必真儒公看吉  
甫何馳驅漢家小康那足道衛霍程李俱有無  
我今無能髮已白少小亦抱滅胡策山林江海

日自深因君還試開弓力莫言落魄高陽生能  
識公為天下名功成奏凱獻天子鏡歌只唱  
薊門行

林世璧

秋思

錦瑟瓊箏聲入雲誰家哀怨不堪聞懷人却望  
關山道極目蒼茫鴻雁羣蕭蕭鴻雁歸何處雲  
海江天忽飛去颯颯風吹菡萏華泠泠露滴梧  
桐樹年年風景轉淒涼况復相思秋夜長起剔  
殘燈默無語潛然空自淚霑裳

擣衣篇

西風白晝已漫漫玉露淒清玉漏殘冰簟銀床  
秋弄色翠幃羅幙夜生寒年年秋夜何蕭索楚  
度芙蓉楚江落閨閣佳人團扇悲關山戍客征  
衣薄閨閣關山片月明相思不盡擣衣情欲知  
此夕淒涼思請聽終宵斷續聲淒涼斷續秋將  
暮為捲珠簾散香霧翡翠樓邊旅雁過鴛鴦沼  
上流螢度流螢旅雁為誰飛飛去飛來淚滿衣

敢惜紅顏凋寶鏡還將清夢繞金微金微白雪  
三千里寶鏡空懸照秋水啼鳥飛花怨管絃青  
苔綠蘚生羅綺羅綺絃歌他自愁春來秋去幾  
時休盈盈巫峽悲雲雨皎皎星河見牛女星河  
巫峽傷心絕天上人間有時別寶幄空浮蘇合  
香羅衣尚掩同心結此時憔悴令人嗟摘盡秋  
霜木槿花擣得寒衣向西寄不知何日到龍沙

喜登黃鶴樓

緬結煙霞想翩然凌紫霄風塵隔仙路雲海思

寥寥六月南風雲影流綠窓翠幌疑清秋中天  
明月客魂靜隨我南登黃鶴樓黃鶴從天來皎  
皎雙毛羽銜珠飛度鸚鵡洲向客翻鳴漢陽樹  
手控黃鶴翎身攀丹霞梯漢江流水幾千里洞  
庭浩蕩玄猿啼樓闌十二圍直上九千尺玉京  
瑤闕相玲瓏五色琅玕照珠席龍吟鸞鳴何啾  
啾丘巒颯沓懸泉流海邊忽見日月耀空中但  
覩烟雲浮素壁兮丹楹朱簾兮繡甍文桂兮羅  
馥修松兮雜生翠嶠窈窕洞天中開氤氳盤鬱



霹靂崔嵬浩歌咲弄斗牛渚飄飄彷彿觀蓬萊  
霞為裳兮雲為烏錦作瑟兮玉為笛仙人三五  
紛下來湘娥漢女咸相覲登高壯觀何慷慨使  
我怳恍神飛揚覺來枕簟生輝光虹霓明滅不  
可狀猶疑漢南靈鶴來翱翔人生處世胡為爾  
古今萬事皆如此楚宮寂寞安在哉月色東隨  
漢江水臨風歌罷不勝情黃鶴何時朝帝京彩  
雲仙客如相待願把芙蓉遊太清

桑紹良

夜光篇慰朱太麓下第

夜光之珠光且瑩前後各照十二乘曾向驪龍  
頷下垂明月澄潭相輝映賈胡剖身不敢藏玉  
函金鑰薦天章廊廟達觀俱未識頓令塵壒掩  
清光年命偃蹇謀計拙長安隘邸日吐吐黃金  
萬鎰價難酬羞向人前涕雙出螺螄牡蠣競光  
華爍爍微茫足自誇肉眼何由辨真贗市廛徒  
爾日諠譁故鄉歸去未為惡世事變遷無定約  
珍重隨侯且待時高山莫用輕彈雀

汪時元

月下吟

客裏年年滯吳越鳳皇山上望秋月空山無那  
白雲寒秋風蕭蕭吹短髮明月照我我徘徊強  
斟綠酒心欲摧白雲倏忽成蒼狗功名富貴安  
在哉館娃宮越王臺只今惟見蒿與萊寂寞沉  
吟孤月下愁聽江聲長夜哀

王寅

乳姑

朝來登堂暮來登堂堂上姑髮如霜再拜解衣  
乳甘漿堂前樹高巢烏身焦毛落雛反哺嗟哉  
新婦反哺姑恩義雖篤非其雛

梁柱臣

燕歌行留別同鄉諸公

北風十月天雨霜蕭蕭木落雁南翔客子飄飄  
辭建康粵南燕北天茫茫戀闕思親不敢忘  
不覺涕泗沾衣裳故園親友揮離觴高情篤誼  
激中腸人生聚散安可常短歌微吟私自傷浮

雲一別隔兩鄉天涯握手限河梁鍾山岩堯江  
水長津亭樹色鬱蒼蒼相思他日遙相望

豫章候館留別貞吉孔陽昆玉

天涯羈客當愁煩誰能十日邀平原維舟偶爾  
依南浦杖劍兼得遊西園西園公子敬愛客訪  
予遠出章江門下車執轡事已古節槩風流今  
尚存淪從竹底停飛蓋復向江上開離樽並壁  
連枝相照耀竒芬秀色饒攀翻徐孺亭東暮雲  
起滕王閣畔秋烟繁焚香散帙無俗討抵掌緩  
頰俱清言坐來明月出沙樹起看暝色沉江村  
相逢意氣且一醉世上局促何足論蹇予正銜  
漢家命窮交敢戀信陵息明朝抗手自茲去落  
霞秋水空銷魂

張邦仁

愛妾換馬

駿馬千金骨佳人絕代姿一朝生意氣易置勿  
移時美色豈不憐所重良在茲入門別愛姬出  
門持青絲食栢常苦辛食梅常苦酸人生各有

欲誰能戀所歡一朝邊境風塵起此馬一日行  
千里霧鬣朝嘶瀚海雲錦鞵夜渡桑乾水瀚海  
桑乾路若何生當封侯廟食死丈夫胸襟落落  
故如此肯學區區兒女子

其二

邊塞風烟動男兒意氣殊以此傾城質易君千  
里駒貴物乃賤人棄取在須臾君心不可量妾  
行徒躊躇仰天悲浮雲低頭辭故夫妾誠不足  
憐此馬何為乎夫行一何遽妾辭一何苦馬上  
珊瑚鞭棄妾塵與土嗟嗟紅顏薄命從來有願  
君功成印如斗

宋登春

再贈顧逸人

吳門豪客美且都十年負劒遊嵩廬黃金百鎰  
俱散盡方衫皂帽行長途江陵帝子敬愛客旋  
遺裘馬驅胡奴花前醉草三都賦肘後常懸五  
嶽圖轉眼看天爾何有回頭大咲滄洲孤而今  
恐有聊城急還留一隻金僕姑

江一鵬

贈別葉茂長

握手相逢是幾年，一帆猶憶廣陵前。  
壯懷跌宕悲浮世，明月高歌萬里天。  
別後寒塘暗秋草，門前五柳清霜早。  
知君不厭酒人遊，扁舟忽泛蓬萊島。  
清尊倒載秋雲白，秋風吹入陶潛宅。  
掀髯一笑天地空，青苔白石江花碧。  
葉生意氣輕王侯，四壁蕭然不解愁。  
馬蹄穿盡長安道，詩名大起鳳凰樓。  
十年著就千秋業，萬顆驪珠光滿篋。  
臨風半醉酒淋漓，白首相看幽意恹。  
柰可離歌不可聞，楚江流水惠山雲。  
送君莫道分離苦，第二泉邊再訪君。

顧冶

寒夜看叔氏女伎喜朱在明顧朗生到賦  
得放歌快之

我家叔氏老季長，帳中每每搖紅妝。  
必逢佳客開春燕，時喚織姬出洞房。  
銀龍吐燭寒暉落，彩鳳飛烟羽衣薄。  
沈聲細轉按吳腔，軟態偏嬌宜

畫閣倚酒寧辭金叵羅當場那問夜如何吾徒  
有交端有神雙璧公然渡馬馱半酣排闥粗賓  
主滿座驩呼但歌舞輕喉新理珠錯盤低鬟重  
掠釵交股看去殊驚絕世逢聽來真覺梁塵空  
李年漫自夸傾國石季不得驕翺風纏頭之錦  
錦官色豈惜尊前買相識人情應已盡蛾眉世  
味其如半雞肋君不見昨者鄒公四五曹上書  
趨死輕鴻毛九關虎豹白日怒雖有區區徒爾  
勞野人無事且行樂只今銅雀惟蓬蒿

春思引

帝鄉渺渺關河裏神臯忽忽風烟起黃山盡繞  
上林枝清渭斜分曲江水玉樓金闕紛相望千  
門萬戶遙相似昭陽殿內報春歸未央臺上足  
春暉水晶却卷鴛鴦幔雲母偏開翡翠幃競道  
西園梅色淺都驚東閣柳陰稀銀蚕吐絲猶未  
暖金燕銜泥試學飛妾本幽閨習歌舞寧知漢  
代多巡撫前年齋祭謁甘泉今歲笙簫祠后土  
桃花萬騎喧長薄蘭葉千旂照平浦長安路夾

古稱難及至春來不厭看杏子裝金轡蒲桃鏤  
玉鞍聳蓋臨平樂回笳出上蘭上蘭仍鄠杜揮  
鞭日將暮紫燕遙馳御溝道青牛近入章臺路  
章臺接建章垂柳復垂楊草鋪走馬埒花壓闌  
雞塲南隣少婦誇妖婉北里王孫駐行幘乍由  
紫陌傷春度翻怪青樓增望遠紫陌青樓二月  
華珠帷翠帳七香車蛾眉畫處眉新樣蟬鬢梳  
時鬢欲斜狂夫一別那無已賤妾孤懷不自理  
縱有蘭閨數十重空遮榆塞三千里榆塞蒼蒼  
杳難測葱嶺沈沈不可識燕然烽火晝長明踈  
勒并泉寒半竭寶刀飛去千星光丹旆銜來掃  
雲沒羌笛橫吹菟郡風戎衣直照龍沙月昨夜  
祁連驛騎還征人猶住玉門關君度山川成白  
首誰憐歲序歇紅顏

鵬風行六月將移家吳門示里中一二親

故

於乎皇天眼老愁欲眯生人理絕半作鬼一春  
惡雨農淹麥七省災荒價騰米黃河以南更苦

水石米四千錢不止磨山粉石山忽平填却饑  
腸終得死烟銷突冷日無光弱被食強強食爾  
饑後誰禁催五瘟道路橫屍飽鳶蟻比估不通  
百貨滯寸積冰紈聽筐篚織工束手斷機絲神  
廟懸骸添傀儡支粮煮粥兩未遍苟延性命須  
吏耳大偷捆載旦出門小童攫糈晝啼市此曹  
饒態安足齒別白衣冠埽廉耻富民勸借尚煩  
簿暴豪劫債不消紙握中有筆亦有字世走江  
河濁難洗總輸豹霧南山隱且趕鵬風六月徙

君不見吳梁鴻當年底首償群豕五噫歌罷依  
廡下香隨俠骨要離起君不見越范蠡扁舟到  
底浮西子三遷金散休田間坐致榮名計然使  
顧生顧生真太癡攀梁提范追襟期孱孤寡母  
連妻兒鄙哉薄夫謂我易堪與卒然相涉皆相  
欺結交馬用識面為獨立迸淚葵榴枝人情反  
覆今何時今何時陽伯夷陰盜蹠君不見京師  
火草場赤朝成灰暮化石





